

**Verhoef, P A 1998 – Ds I D Krüger: Die mens en sy preke**

Uitgewer: Tekskor B K – 134 bladsye.

**Resensent: Ds C Pretorius**

Die skrywer huldig in die publikasie die gedagtenis van 'n eggenoot, vader, skoonvader, volksman en veral Dienaar van die Goddelike Woord. Die publikasie bestaan uit twee afdelings. Deel I beskryf oorsigtelik dominee Krüger se familieherkoms. Ander fasette van ds Krüger se menswees soos sy jeugjare en skoolopleiding, teologiese studie, huwelik en gesin en herderwees in gemeentes word geskets. Deel II, Sy Preke, beslaan die grootste gedeelte van die publikasie en is 'n keuse uit preke wat van 1911 tot 1965 strek.

Die preekstof is tematies en kronologies onder die volgende opskrifte georden:

Intreepreke, Preke in wyer kerkverband, Preke oor die gebed, Hervorming, Ouerlike tug, Uitverkiesing, Oor die laaste dae en Volksaangeleenthede.

Die laaste twee preke wat opgeneem is, is ds Krüger se laaste preek op 27 Junie 1965 en ds Alwyn du Plessis se preek by die begrafnis van ds I D Krüger. Die preekstof getuig van Bybelse teologie wat met die grondteks en Bybelse geskiedenis rekening hou. In die preke word verskeie aspekte van ds Krüger se teologie, soos sy kerkbegrip, duidelik. Vir hom is die kerk die strydende kerk en "ark" in die wêreld. Die kerk, en ampte daarin, bly egter draer van die vleesgeworde Woord. Ds Krüger is terdeë bewus van strome en dwalinge in sy tyd. Hiervan is die preek in verband met geloofsgenesing (p 49) 'n voorbeeld. Eweneens dui die preek van 21 November 1920, by geleentheid van dr Abraham Kuyper se dood, op sy waardering en insig van Kuyper se teologie. Dat die skepping vir Kuyper die holte vir die kerk se voet is word deur ds Krüger so beskryf: "Die doel van die hele skepping het vir Kuyper bestaan in die toegewyde diens aan en verheerliking van die Skepper" (p 60). Sy vertroosting van die Afrikanervolk in tye van droefheid kon soos met president M T Steyn se afsterwe (p 101) en die 1918-Griep epidemie (p 117), getuig van 'n noue verbintenisse gebou op geloof. Die publikasie bevat verskeie foto's en 'n indeks dien die naslaan van spesifieke temas, persone, en Skrifverwysings. Buiten enkele drukfoute is die teks goed versorg en in 'n maklik leesbare lettertipe gedruk.

---